



L'Arche du Seigneur est conduite par Dauid, & ceux de Iuda, en Ierusalem, avec grande joye ; dont sa femme Michol se mocque.

DAVID voyant son regne fauorisé de Dieu, voulant reconnoistre ce benefice, amassa tous les esleus de Iuda pour amener l'Arche du Seigneur des Armées, seant entre les Cherubins sur icelle, & mirent l'Arche sur vn chariot neuf, qui fut conduit par Oza & Ahio, fils d'Aminadab, chez lequel l'Arche auoit esté long-temps en garde en Gabaa. Et lors Dauid & ceux d'Israël joüoient de diuers instruments en la presence du Seigneur ; mais l'Arche estant venuë en l'aire de Nachon, les Bœufs qui la portoient en regimbant, la faisoient pancher de costé, qui fut cause qu'Oza la retint de la main, dont le Seigneur le frappa de mort pour sa temerité. Alors Dauid fut triste, & craignit le Seigneur, disant : Comment entrera l'Arche chez moy ? partant la fit tourner en la maison d'Obed-Edom, Gethéen, que le Seigneur auoit benit, & y fut trois mois. Mais Dauid enfin l'amena en Ierusalem, avec danse, & oblation qu'on immoloit, & joüoit de sa harpe en sautant de joye ; dont sa femme Michol luy reprocha, qu'il s'humilioit & découuroit comme vn plaisanteur ; mais Dauid luy dit, Je jouëray deuant le Seigneur qui m'a plustost esleu que ton pere, pour estre Roy sur Israël.